



Siumut sinnerlugu Inatsisartuni ilaasortaq
Jens Immanuelson

Ikummatissanik pilersuineq pillugu § 37 naapertorlugu apeqquteqaammut akissut

Siullermik ikummatissat akii pillugit apeqquteqaatinnut qutsavigerusuppakkit. Periarfissaq iluatsillugu erseqqissaatigissavara, ikummatissat akiisa qaffakkiartorneranni inuiaqatigiinni eqimattakkaat amerlasuut, ilanngullugit aalisartut piniartullu, sunnerneqarnerat Naalakkersuisunit paasilluaratsigu. Matuma kinguliani apeqqutit akissuteqarfigissavara, taannalu imatut nipeqarpoq:

Sinerissamut qanittumi aalisartut piniartullu olie-ip akitsornerani, naalakkersuisunit immikkut ikiorserniarlugit suliniuteqarfiginiarneqarpat, tamannalu pissappat qaqugu?

Innuttaasut sumiluunniit najugaqaralarunik ikummatissamik pissarsisinnaanissaat, kiisalu ikummatissamut akiusut isertitanut naleqqiullutik naammaginaruunissaat Naalakkersuisut pingaartippaat.

Taamaattumik tamanna pissutigalugu Naalakkersuisut KNI A/S-imut (Polaroil) kiffartuunneqarnissamik isumaqatigiissuteqarput, nuna tamakkerlugu ikummatissamik pilersuinissamut qulakkeerisumik, kiisalu akit ilusaannik aalajangersaaffiusumik. Kiffartuunneqarnissamik isumaqatigiissut taanna 2016-ip naanissaanut atuuttussaavoq.

Nunarsuarmi niuernermi akit ineriartornerat, aammalu assartuinnermut, toqqortaqaarnermut, taassumalu ataani tankeqarfinnik aserfallatsaaliuinnermut aammalu Kalaallit Nunaannut nunallu iluani uuliamik siaruarterinnermut aningaasartuutit tunngavigalugit ikummatissamut akiusut kiffartuunneqarnissamik isumaqatigiissummi aalajangersarneqartarput. Tamatuma peqatigisaanik sinneqartoorutissat amerlanerpaaffissalerneqartarput, taamaalilunilu akiusut atuisunit akilernerqartartut aningaasartuutiviusunit qaffasinnerungaartinneqarneq ajorput.

Tassalu ikummatissamut akiusut aningaasartuutiviusunik tunngaveqarput – aammalu pissutsit, Naalakkersuisut sunniuteqarfigisinnaanngisaat arlallit tunngavigalugit aalajangersarneqartarlutik. Taamaattumik inuiaqatigiittut ikummatissat akiisa allanngortarnerat akuerisariaqarparput.

Apeqqutinnut tunngatillugu ilisimatitsissutigisinnaavara, aalisartunut piniartunullu immikkut ittumik ikiuutissanik atuutsitsilernissamik Naalakkersuisut pilersaaruteqanngitsut.

22. maj 2012
Sagsnr. 2012-065954
Dok. Nr. 914564
Postboks 909
3900 Nuuk
Tlf. (+299) 34 50 00
Fax (+299) 34 54 10
E-mail: iaan@nanoq.gl
www.nanoq.gl

Aalisartunut piniartunullu aaqqissuussinernik immikkut ittunik atuutsitsilernissamut pilersaaruteqartoqannginnera, aalisakkanik tunisinermi akisut qaffannerinut atasutut isigineqassaaq. Ineriartornerup kingulliup nassatarisaanik aalisarnermi isertitat qaffapput, tamatumalu aamma aalisarnermi ikummatissamut akit qaffannerisa kingunerisaanik aningaasartuutit amerlissutaannik matussusiinnaalerneq kingunerisussaassavaa.

Ikummatissat qaffannerisa sunniutissaannut Naalackersuisut annilaangassuteqannginnerattut tamanna paasineqassanngilaq. Taamaangilluinnarpormi. Aammattaaq ikummatissamut akit qaffannerinit piniartut aalisartullu ilaat eqqugaarujussuarsinnaammata Naalackersuisut ilisimaaraat.

Kisiannili Namminersorlutik Oqartussanut aningaasaqarnermi sinaakkusiunneqartut iluanni kiffartuunneqarnissamik isumaqatigiissut atuuttoq – tassalu ikiorsiissutit immikkut ittut pinnatik – inuiaqatigiinni eqimattanut tamanut akit naammaginartut atorlugit ikummatissamik pilersuinerup patajaatsup qulakkeerneqarnissaanut periaasiuvoq pitsaanerpaaq.

Neriuppunga matuma siuliani apeqqutit akisimassallugu, aammalu sooq Naalackersuisut piniartunut aalisartunullu ikiorsiissutissanik immikkut ittunik atulersitsinissamik siunnerfeqannginersut nassuiarsimassallugu.

Inussiarnersumik inuulluaqqusillunga

Jens B. Frederiksen